

Doinua: Norbere mundu intimo

1.Gabon, politta! Hemen dun
nire testimonioa
loarekin sinatzeke
zeukanat konbenioa
autodestruktiboa dun
sortzaileon gremioa,
aldira baieztatzen din
gau-egun binomioa;
begizulo markatuak,
goizetako jenioa...
gauerdian beti ditun
sormena, injenioa...
manta azpira heltzean
ametsen eldarnioa
bi ohekide zeuzkanat:
hi eta insomnia.

2.Mesanotzeko ilargi
iheskorraren argitan
desio ezkutuenak
behingoz haragi bizitan
azalean inurriak
eta tximeletak tripan
gorputza biltzen dinaten
maindireen inbiditan...
Grabitaterik ez zegon
hire gelako orbitan.
Metafora egokirik
ez dun idatzi lirikan,
hi edertzeko margorik
ez dun sortu kosmetikan...
polittena hagolako
beti esnatu berritan.

3.Laztan batekin esango
dinat "Egun on, lazтана"
behatzekin esnatzeko
hire azal beltzarana.
Oso nahastuta zebilen
hireganako imana;
batzutan higandik ihes
besteetan hiregana.
Hi gosaldur nahi haunat ez
tea eta kroasana,
ahaztu despertadorea,
eguzkiaren orbana,
jantzi irri bihurri bat
eta erantzi pijama,
eguna hasi arren ez
dinat igo nahi pertsiana.

4.Pertsiana altxatu gabe
dardarka zeuden kortinak,
elkar maitatzeko arau,
norma eta paradigmatik.
Nahiz abestian bostehun gau
aipatzen dizkin Sabinak
bilakatuko al gaitun
gau bateko heroinak,
gudu-zelai honetako
eromenaren biktimak?
Izarak lubaki ditun
ta hire musuak minak...
mihi puntaz tatuatu
nahian galderen errimak;
egin dizkinate inoiz
betileekin kilimak?

5. Aldiro ezberdin diren
gorputzeko usainetan,
kartografiatu ezin
ditudan hire zainetan,
barrurantz naramaten
paradisulabainetan,
plazerraren suak higan
utzitako orbainetan...
Galdu nahi dinat aurkituz
hire izter lirainetan
askatasuna, sentituz
boterea mingainetan,
ustekabe emanenez
hozkada bat ordainetan
nire goiko ezpainekin
hire beheko ezpainetan.

6. Normarena nahiko niken
pentsamenduan atxiki
ez gaitun eta gizarte
honen menpeko maniki
libre hautatu nahi dinat
noiz etzan eta noiz jeiki,
noiz atximurkadaz josi,
noiz besarkatu poliki...
Sexua iraultza badun
bi alu eta lau titi
borrokabideak ditun
-konturatu naun berriki-.
Batera egin dezagun
barne inpultsuei jarraiki
ikasialdeseraiki
eta hutsetik eraiki.

7. Eraikitzea zaila dun
dena deseraikitzean
baina ahaldundu ohi naun
hirekin konpartitzean
koloretsu agertu haiz
nire logela grisean
hiru metro karratutan
jardun gaitun tetrisean.
Azken musu bat emanda
hire irri konplizean
"Agur, politta, ondoloin!",
logurea sentitzean
begiak itxi dizkinat
hauen karga handitzean
ea hor jarraitzen dunan
berriro irekitzean.

8. (Gutuna bukatu dinat,
baina barka zan) post data:
azken bertso bat buruan
zeukanat-eta bueltaka
badakin hire barruan
urtu nahi dinat tantaka
sekretu ezkutuenak
deskubritzeko banaka.
Betidanik izan dinat
irudimena zabal ta
idealizatu ostean
hire gorputza atalka
berriro sentitu dinat
insomnioaren talka
gaua luzea dun, hemen
hi besterik ez haiz falta.